

a tous nos sauvages, ie luy seruois d'interprete. toute l'eglise estoit pleine et les chapelles. il nous arriua neantmoins ce mesme iour apres le depart de Monseigneur l'Euesque prés de Soixante personnes, dont une partie estoient ces nouveaux arriué de l'Acadie dont iay parlé. ie uous assure que nostre grand Hospital des nouveaux conuertis est maintenant comme un monastere tant on y uoit de pieté et de paix, la boisson en estant bannie; ie ne scay pas si cete paix durera longtems, i'y tiendray la main tant que ie pourray de mon costé les voyages a Quebec ne me coustent rien pour cela, quoyqu'ils me fatiguent un peu estans assez frequens mais Helas si St. Ignace eust tout uoulu faire et souffrir, pour empescher un seul peché mortel, dois je plaindre ma peine, ayant empesché peutestre plus de Sept ou huict cent peches mortels depuis quelques iours que ie me remüe tant pour arrester les desordres de l'yurognerie dans les sauvages de nostre mission, et dans les autres qui ne faisans que passer icy, sont beaucoup plus deregles sur ce point que les chrestiens les plus lasches que iaye icy. ah mon Pere que ie uous estime heureux, me disoit il y a quelques iours monseigneur nostre Euesque voyant ce qui se passoit dans nostre mission, que ie uous estime heureux d'auoir empesché depuis quelque temps, tant de peches mortels, assurez uous que Monsieur le Marquis et moy nous autoriserons fortement tout ce que uous feres sur ce point, et que nous informerons parfaitement la Cour que non seulement ce n'est point eloigner les sauvagés des francois, que de leur faire une rigoureuse deffence de s'enyurer, mais que c'est le moyen le plus efficace pour les gagner à